

# Il C daventa dumonda da destin

Il politolog Clau Dermont davart l'avegnir – forse cuminaivel – da las partidas PCD e PBD

DAD ANDREAS CADONAU/FMR


■ **Rinforzar la politica dal center cun unir las duas partidas PBD e PCD en ina nova forza. Quai fa senn, manegia il politolog Clau Dermont, e quai uss e betg pir en dudesch onns. El na vesa betg grondas perspectivas per las duas partidas sch'ellas sa decidan per ina via futura independenta.** Per regla è l'ambient da las partidas politicas detg stabil en Svizra. Tant pli interessantas èn fasas, nua che novas forzas provan da s'establi, u svaneschan ubain annunzian da vulair s'unir.

Uschia che las stentas dals timuns da la Partida cristiandemocratica e da la Partida burgais-democratica da furmar ina nova forza politica en il center leventa l'interess dals politologs. *Clau Dermont* na vesa betg in avegnir empermettent per omaduas partidas per cas ch'ellas sa decidan da cuntinuar sin l'agen binari. «La PBD po bain sa concentrar sulet sin la politica grischuna.» En quel cas perda ella attractivitat per giuvnas e giuvens politichers cun ambiziuns da reussir en la politica naziunala, manegia il politolog. «Sulet plaz-

zar in u dus candidatas u candidats sin in'autra glista naziunala, per exempel da la PCD, po strusch esser in'opziun empermettent per giuvnas e giuvens politichers da la PBD.»

Dentant era per la PCD vesa il politolog in futur precar. «Sin palancà naziunal èn ils verds pli fermes che la PCD, uschia ch'il sez da la PCD en il Cussegl federal è urgent periclità a lunga vista.» Dermont po uschia senz'auter suandar las visiuns dal president da la PCD, *Gerhard Pfister*.

El attribuescha al president da la PCD abilitads strategicas e la veglia da mantegnair e recaltgar influenza en la politica naziunala. «Furmar il futur dal pajais è in dals intents principals da mintga activitad politica.» Or da quella perspectiva po Dermont chapir la midada da l'opiniun da *Pfister* pertutgant il C en il num da la partida. Antruras in aderent dal C, accentuescha *Pfister* ussa la necessitad da cuntinuar sut ina nova ensaina comunablamain cun la PBD.



## Betg star in a l'auter sin ils pes

Per in avegnir comunabel pleda tenor Dermont la derasaziun da las duas partidas. Tant en il Grischun sco en ils ulteriurs chantuns possedan las duas partidas

il pli ferm sustegn en differents intschess. «En il chantun Berna per exempel è la PCD inexistenta, la PBD gioga là ina tscherta impurtanza politica.»

Pertutgant il chantun Grischun ha Dermont visà per exempel a la Surselva sco lieu da tschep da la PCD visavi l'Engiadina Bassa e la Tumleasta nua che la PBD posseda ina ferma posiziun. «Pon ils impurtants represchentants da PBD e PCD pledentar comunablamain votantas e votants cun soluziuns futuras durablas per il Grischun e la Svizra, alura posseda ina nova forza en il center bunas perspectivas da reussir.»

Perspectivas èn avant maun dad omaduas varts per exempel pertutgant la politica dal clima ed auter. Dermont ha menziunà *Martin Candinas* ed *Urs Widmer* sco pussaivels protagonistas dad in nov moviment politic dal center che possedan senz'auter potenzial da persvader ed uschia recaltgar vuschs sur l'entir intschess dal chantun Grischun. Dermont è dentant conscient ch'omaduas partidas ston pledentar e promover da-

pli dunnas e porscher ad ellas ina pli vasta plattafurma en in nov moviment politic. «Las dunnas giogan in'impurtanta rolla en la politica futura.»

## La dumonda decisiva

Uschia che la PCD e sia decisiun davart il C en il num da la partida daventa decisiva per il destin tant da la PCD sezza sco da la PBD. Per Dermont èsi cler che la PBD na vegn betg simplamain a cuntinuar sut il tetg da la PCD. Senza ina redefiniziun dal center politic è da quintar che tscherts votants da la PBD midian tar ils liberals u la PPS, e be ina part sustegna la PCD. Gia il moviment antecessur da la PBD, ils democrats grischuns, èn s'unids avant decennis. Alura cun in moviment sumegliant dal chantun Berna, la Bauern-, Gewerbe- und Bürgerpartei tar la Partida populara svizra. Da lez temp in'istorgia da success, dentant sut tut autras cundiziuns, sco quai che Dermont ha accentuà. La PPS è sa sviluppada – sut batgetta turtigaisa – a l'ur dretg dal spectrum politic ed ha stuschà da la vart tutta concorrenza. Concorrenza exista dentant er en il center politic svizzer. E cun quella concorrenza ston PBD e PCD sa mesurar, forse sut in tetg comunabel.